

Tidak tahan bau busuk banjir

PONTIAN - Keadaan banjir sejak lima hari lalu, turut meninggalkan bau busuk dan mengundang ketidakselesaan kepada mangsa terutamanya penduduk di Kampung Parit Abdul Rahman, di sini.

Seorang penduduk, Rohani Sileng, 51, berkata, sistem perparitan yang tersumbat menyekat pengaliran keluar air banjir ke sungai sekali gus menimbulkan masalah bau busuk.

"Air banjir yang tersekat sejak lima hari lalu, kemudiannya bercampur dengan sisa-sisa buangan dari rumah penduduk.

"Lumpur dan sampah yang dibawa air juga berbau menyebabkan sisa kotoran banjir melekat pada peralatan rumah susah untuk dibersihkan," katanya.

Menurutnya, banjir yang berlaku pada tahun ini adalah yang terburuk

pernah dialami sejak 30 tahun lalu.

"Sungai Benut yang terletak berdekatan kampung, menyebabkan kerap berlaku limpahan air sungai terutamanya pada musim tengkujuh setiap hujung tahun.

"Banjir diburukkan lagi dengan benteng yang pecah disebabkan aliran air yang begitu deras," katanya.

Rohani berkata, dia sekeluarga sudah kerap dipindahkan ke pusat pemindahan sementara selepas rumahnya ditenggelami air setiap kali musim hujan dan air pasang.

"Memang sedih setiap kali lihat rumah dinaiki air, tiada apa yang dapat dilakukan selain berdoa agar benteng tidak pecah dan segera dibaiki.

"Penduduk meminta pihak berkaitan supaya melihat semula keadaan benteng di sini, supaya kejadian banjir dapat dielakkan," katanya.

Bagi, Saileh Kasuak, 61, berkata, kesan bau busuk air masih dapat dihidu selepas banjir surut.

"Kami sekeluarga terpaksa menahan bau busuk air ketika rumah dibersihkan selepas banjir reda.

"Malah ia sudah menjadi rutin kami sekeluarga memandangkan rumah kerap dinaiki air kerana terletak berhampiran dengan benteng," katanya.

Menurutnya, dia sekeluarga pernah terfikir untuk berpindah kerana tidak tahan menghadapi banjir yang berlaku setiap tahun.

Namun, dengan pendapatan suami yang bekerja sebagai nelayan, impian untuk berpindah terpaksa dilupakan.

"Saya berharap ada pihak yang dapat membantu penduduk mencari punca banjir dan segera mengatasinya," katanya.